

四聖心源

亥23

71-141

亥23

71

共24册



黃氏
種
七十
七十

吳郡顧復初
題首

同治七年歲在
戊辰禁于成韻



北京中医药大学图书馆版权所有

聖心源

十卷

重刻黃氏醫書序

古今醫書汗牛充棟讀不勝讀尤刻不甚刻也不善讀者徂
於所習失之於偏則其誤猶在一己不善刻者茫無所擇失
之於濫則其害將徧天下夫刻書者豈嘗有意貽害哉其心
方以著書立說皆有利於人世而詎知適以成害耶且天地
間之可以生人者無不可以殺人者也聖人體天地好生之
心制爲種種生人之具後世寢失其意遂往往至於殺人兵
刑其大端而醫術則亦非細故也上古醫藥未興其民多壽
後世方書日繁其民多夭其故何哉蓋醫藥非所以生人特

補天地之或有所憾而人乃恃有醫藥每無疾而致疾有疾而又不慎其疾此殺人之所以多也夫神農著本草而後世讀本草者輒各主所見其說不同越人著難經而讀難經者復不求甚解而其旨益晦聖人以生人之心著書故其書一而精世人以售術之心著書故其書駁而辨彼淺陋者勿論已卽專門名家赫赫在人耳目者亦不免有自炫其術之見此仲景氏金匱一書能以生人爲心故遂獨有千古而昌邑黃氏宗之微言創義暢發其旨亦可謂獨得千古之秘者矣顧其書不甚傳陽湖張氏求其全集積二十年乃得刊行於

世於是遠近始稍有知之者夫學儒不宗六經而好騁白氏
之說其學卑習醫不宗仲景而墨守一家之言其術謬譬如
聖人制兵與刑辟以止辟刑期無刑皆生人之心也自姑息
之政行嚴酷之吏起而生意凋敝矣予旣讀黃氏之書而猶
恐其行之不遠也復命次兒汝琮鋟版多印以寄四方願好
言醫者家置一編卽欲藉以售術亦庶幾不失宗旨也夫同
治七年十二月江夏彭崧毓撰

黃氏遺書序

醫者生人之術也不善用之則之生而之死昔仲景痛宗族之淪亡患醫者之不研求經旨著傷寒金匱諸書方術家奉爲神明競相祖述顧其文詞簡古理解深微猝難尋求又爲王叔和亂其篇第旨趣隔越加以庸工罔識私智穿鑿別立異說枝葉橫生譌謬百出遂使學者去此昭昭卽彼昏昏幾成痼疾蓋自宋元以來斯道榛蕪極矣國朝龍興間運遂開古來絕學自晦昧而就高明如日再中卽方術一家亦駸駸乎抗衡往哲標準來茲若吳江徐靈胎

錢塘張隱菴吳門葉天士閩中陳修園諸人皆有廓清推陷之功羽翼闡揚之力而集其大成者尤推昌邑黃坤載先生先生著書以地元爲主以扶陽抑陰爲義窺其旨趣蓋原本大易合符河洛約契參同所謂陰陽會通元冥幽微者於仲景之學不啻親承謦欬而面聆緒言也夫死病而藥生之醫莫不有是心也乃生病而藥死之夫豈醫者之本意抑亦誤於其所讀之書而已先生痛心疾首於謬種之流傳而獨以超悟析此微言其有功於仲景豈淺鮮哉抑其有德於生民豈有涯涘哉彭器之觀察服膺是書謀鋟版於蜀以廣其傳

並丐余一言以爲重余惟先生之書凡有識者皆知其不可
祧特恐學者龔諺承譌不肯捐棄故技故特表章之庶幾知
所從事云爾時

同治七年歲在戊辰八月之吉完顏崇實序

重刻黃氏遺書序

昌邑黃坤載先生學究天人湛深易理其精微之蘊托醫術以自見著傷寒懸解金匱懸解傷寒說意長沙藥解玉楸藥解四聖心源四聖懸樞素靈微蘊等書凡八種一掃積蒙妙析元解自仲景以後罕有倫比其宗旨言中皇轉運沖氣布濩水木宜升金火宜降而已蓋乾坤之運一闔一闢陰陽之用一消一長易道易簡理固如是卽醫亦豈有殊理哉且惟聖人爲能法天自大賢以下則皆法地夫豈不用天天在地中故也黃泉黑壤深潛九幽而一陽自地而發生五行附地

而旋轉而變化裁成之道在此矣余嘗取先生所言證之靈
樞素問及傷寒金匱諸書意皆符合特古人未嘗顯言至先
生始揭其祕耳先生虛明研慮嘗自負古今無雙曩時讀仲
景書幾乎一字不解迨其後一旦大悟遂成此八種夫以先
生之虛明而猶有所不解其不解殆非猶夫人之不解矣以
先生之研慮而猶有待於悟其所悟殆非猶夫人之所悟矣
乃至於既悟而所言之理固猶夫人之所知也然不能不推
先生爲獨知老子曰知常曰明又曰上士聞道勤而行之中
士聞道若存若亡下士聞道大笑之不笑之不足爲道然則

讀先生是書者可於此而得其微意所在矣夫易言天道而寄其用於卜筮先生明易而著其理於醫術天下事何淺之非深何遠之非近豈獨醫爲然哉器之觀察將刻是書嘉惠學者以復初略嘗從事於此屬爲序言爰述大旨至其精微所在不可得而陳也

同治七年歲次戊辰九月之吉吳郡顧復初序

四聖心源自敘

醫有黃帝岐伯越人仲景四聖之書爭光日月人亡代革薪
火無傳玉楸子憫後世作者不達其意旣解傷寒金匱乃於
己巳二月作四聖心源解內外百病原始要終以繼先聖之
業創闢大略遇事輟筆庚午四月北遊帝城十一月終南赴
清江辛未二月隨

駕武林四月還署研思舊章十得其九厥功未竟八月十五
開舟北上再客京華壬申十月作天人之解續成全書癸酉
二月解長沙藥性五月刪定傷寒七月筆削金匱八月修溫



疫痘疹成於九月十七維時霖雨初晴商飈徐發落木飄零
黃葉滿階玉楸子處蕭涼之虛館坐寂寞之間牀起他鄉之
遙恨生故國之綿思悲哉清秋之氣也黯然遠客之心矣爰
取心源故本加之潤色嗟乎往者虞卿違趙而著春秋屈原
去楚而作離騷古人論述往往失地遠客成於羈愁鬱悶之
中及乎書竣業就乃心獨喜然後知當時之失意皆爲後此
之得意無窮也向使虞卿終相趙國屈原永宦楚邦則離騷
不作春秋莫著迄於今其人已朽其書不傳兩人之得意不
如其失意也當時安樂之人其得天者誠厚然隙駟不留尺

波電謝生存而處華屋零落而歸山邱身與夕露同晞名與
朝華並滅荆棘狐兔之中樵牧歌吟之下其爲安樂者焉在
竊以爲天之厚安樂之人不如其厚羈愁之士丈夫得失之
際非俗人之所知也顧自己已以至壬申厯年多矣元草未
就是天旣長與以窮愁之境而不頻假以蕭閒之日帝眷之
隆何可恃也良時非多勗之而已癸酉九月甲戌昌邑黃元
御

黃氏醫書八種總目

四聖心源 十卷

四聖懸樞 五卷

玉楸藥解 八卷

金匱懸解 二十二卷

傷寒懸解 十四卷

長沙藥解 四卷

傷寒說意 十卷

素靈微蘊 四卷

